

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : Y.B. DATUK MOHD FASIAH BIN
HAJI MOHD FAKEH [SABAK BERNAM]

TARIKH : 24.10.2016

SOALAN :

Datuk Mohd Fasiah bin Haji Mohd Fakeh [Sabak Bernam] minta **MENTERI PENDIDIKAN** menyatakan sejauh manakah langkah Kementerian mentransformasikan sistem pendidikan negara melalui Pelan Pembangunan Pendidikan Malaysia (2013-2025) khususnya daripada aspek kualiti pendidikan telah memberi kesan langsung terhadap pencapaian sekolah dan keberhasilan murid dan nyatakan bilangan sekolah berprestasi tinggi dalam Band 1 dan 2 yang telah berjaya diwujudkan semenjak 2012 serta nyatakan langkah Kementerian bagi meningkatkan bilangan sekolah berprestasi tinggi berkenaan terutama sekolah-sekolah di luar bandar.

JAWAPAN

Tuan Yang di-Pertua,

Inisiatif di bawah Pelan Pembangunan Pendidikan (PPPM) 2013 – 2025 telah berjaya meningkatkan bilangan sekolah dalam Band 1 dan Band 2 kepada 39.9 peratus pada penghujung Gelombang 1 (2013-2015) berbanding pada tahun sebelumnya iaitu tahun 2012. Selain itu, jurang pencapaian akademik antara bandar dan luar bandar dalam Gelombang 1 yang diukur melalui keputusan peperiksaan UPSR juga menunjukkan

pengurangan sebanyak 31.6 peratus, mengatasi sasaran yang telah ditetapkan iaitu 25 peratus.

Kementerian Pendidikan Malaysia melaksanakan program bimbingan peningkatan prestasi sebagai usaha untuk meningkatkan bilangan Sekolah Berprestasi Tinggi (SBT) yang mempunyai etos, watak, identiti tersendiri dan unik serta menyerlah dalam semua aspek pendidikan terutamanya bagi sekolah-sekolah yang berada pada Band 3 untuk melonjak ke Band 1 atau Band 2.

Bagi sekolah Band 1 di bandar dan luar bandar, bimbingan juga dilaksanakan berfokuskan Standard Kualiti Pendidikan Malaysia (SKPM) dan instrumen annex SBT yang meliputi bidang kepimpinan murid, pencapaian kokurikulum, jaringan, jalinan dan penandaarasan.

Untuk makluman Ahli Yang Berhormat, sehingga kini terdapat sebanyak 132 buah Sekolah Berprestasi Tinggi (SBT) yang terdiri daripada 68 Sekolah Rendah dan 64 Sekolah Menengah. Ini merangkumi semua jenis sekolah iaitu SBP, SMK, SMKA, SK, SJKC dan SJKT di bandar dan luar bandar.